

und sollen auch hinfuron nicht mer gestattet noch zugelassen werden, ausserhalb der gebrauch und gewonhaitn, so bey annembung auf di handtwerch und mit den leereselln gehalten wirdet; dabey soll es verpleiben. Aber in verkauffung aller hanndtwercher soll kain entliche saczung, wie es im kauffen oder verkauffen gehalten werden soll, gemacht noch geordent werden, damit der armb als der reich sein notturfft von den handtwerchern desto wolfailler khauffen muge und die teurung von wegen aines iden nucz und pessten vermittn bleibe. Und was wir also jeder zeit fur ordnung durch die personen, so von unns darzue verordent, bey den handtwerchern und wirtten wegen der herbergen auf- und anrichtn wurden, denselben sollen sy gehorsamlich nachkhumben, und der rat soll darob sein, damit dem allem vollziehung beschehe, hanndthaben und sein vleissig aufsehn haben. Wie wir auch wegen des piergelts, so sy unns auf ebig zu geben schuldig, dergleichen mit unnsern zölln im marggraffthumb jeder zeit ordnung furwenden und bevelch thun werden, dem sollen sy gehorsamlich nachseczn, geleben und nachkhumben. Derhalben haben burgermaister, ratmanne und ganncze gemainde vilgemelter unnsrer stat Camencz fur sich selbst, ire erben und nachkumben und anstat irer mitwoner unns, unnsren erben und nachkhumbenden kunigen zu Behaim und marggrafn zu Lausicz bey iren waren wortn und glauben an aids stat zugesagt und versprochen, das sy sich in diesem allem gehorsamlich und undertenigist, als unsere getreue undertanen, gegen unns, irem kunig und erbherrn, verhalten wellen und sollen und sich, als unnsrer chamer, nach unns, unnsren erben, nachkhumbendn kunigen zu Behaim und marggrafn zu Lausicz, richten und halten. Des zu urkhundt besigt mit unnsrem kuniglichen anhangunden innsigl. Geben auf unnsrem kuniglichen shlosß Prag am ersten tag des monats octobris nach Cristi gepurt tausent funffhundert und im sibem und vierzigisten, unnsrer reiche des Römischen im sibenzehenten und der annderen aller im ain und zwainzigisten jaren.

Ferdinand mpp.

Unter der Plicatur: Henricus burgravius Misnensis,
s. r. Bohemie cancellarius.

Auf der Plicatur: G. v. Logau.

266.

Augsburg, 1547 Dec. 14.

Hdschr.: Or. Pap. Stadtarchiv Kamenz No. 130 mit aufgedrucktem S.

König Ferdinand gestattet Bürgermeister und Rathmannen der Stadt Kamenz, das sy vierthalt tausent gulden Reinisch auffbringen, entlehnen unnd zu irer gemainen statt notturfften gebrauchen mugen. — Geben in unnsrer unnd des reichs statt Augspurg den viertzehenden decembris anno 2c. im sibem und viertzigisten, unnsrer reiche des Römischen im sibentzehenden, des Hungerischen im ain und zwaintzigisten unnd Behmischen im zwai undt zwaintzigisten.